

بِسْمِ اللَّهِ الرَّحْمَنِ الرَّحِيمِ

الحمد لله رب العالمين وصلى الله على سيدنا محمد وعلى آله وصحبه الطيبين الطاهرين وبعد:

Qabashada Xafladda lagu maamuusayo dhalashadii Nabigeenii Muxamad nabadgelyo iyo naxariisi korkiisa ha ahaatee, kaas oo uu Eebbe ugu soo diray dunida naxariis ahaan, ayada oo la akhrinayo aayado Quraanka ka mid ah, lana sheegayo qaar ka mid ah wanaagga nabigiinii sharafta alahaa, waa arrin barako iyo khayr badani ku jiraan, haddii uu ka marnaato xafladdaasi waxyaabaha bidcada ah ee xun ee aanan sharcigeennu ogolayn.

Waana in la ogaado in xalaalaynta arrimaha ama xaaraamayntoodu ay tahay howsha culumada waawayn sida Imaam Maalik iyo Shaafici iyo Abii Xaniifa iyo Axmad bin Xambal Allaha ka raalli noqdee ayaga iyo selefki wanaagsanaaba, xaq uma laha qof buug yar qoray ama mid wayn in uu qaato howshii culumada waawayn ee selefki wanaagsanaa ka midka ahaa oo uu kolkaa wax xalaaleeyo ama xaaraameeyo asiga oo aan u laaban hadalkii culumada waawayn, kuwaa oo ummadda Islaamka kuwii hore iyo kuwii dambe intuba u qireen in ay ahalu khayr ahaayeen, hadaba qofkii xaaraameeya xusidda Eebbe waynaayee, iyo sheegidda wanaaggii Nabiga nabadgelyo iyo naxariisi korkiisa ha ahaatee maalinta uu dhashay, nabadgelyo korikiisa ha ahaatee, ee ku andacooda in aanan nabigu sidaa falin, waxaannu ku leenahay: Ma xaaraamaynaysaa mixraabyada masaajidyada loo sameeyay oo waxaad aaminsantahay in ay bidco lagu lumayo tahay?! Mise xaaraamaynaysaa aruurintii quraanka lagu soo aruurshay hal kitaab iyo dhibcayntiisii adiga oo ku andacoonaya in aanan nabigu samayn?!

Haddii aad waxyaabahaas xaaraamaynayso, waxaad cariiri gelisay waxyaabihii uu Eebbe u ballaarshay addoomihiisa ee ay ka mid yihiin samaynta falal khayr ah oo aan la aqoon waagii nabiga, Wuxuuna yiri Nabigii Alle, Nabadgelyo iyo Naxariisi korkiisa ha ahaatee: **(Qofkii Islaamka ku soo dara fal wanaagsan, wuxuu leeyahay ajirkiisa iyo ajirka qofkii asiga ka dib fala, ayada oo aan waxba laga naaqusin dadkaa ajirkooda)** Waxaa soo weriyay Imaam Muslim oo ku soo weriyay Saxiixiisa.

Wuxuuna yiri Khaliifkii Cumar bin Khitaab ahaa, Allaha ka raalli noqdee, kolkii uu dadka oo dhan kulmiyay si ay ugu daba tukadaan hal imam salaadda taraawiixda: **"Waxaa la mahadshay bidcada tan"** Wuxuu ku soo weriyay Imaam Bukhaari saxiixiisa.

Sidaa darted wuxuu yiri Imaam Shafici, Allaha ka raalli noqdee: "Waxyaabaha dadku samaynayaan waa labo, mid waa wixii fal ah ee khilaafaya Kitaabka ama Sunnada ama Asaxaabta warkoodi ama Ijmaaca, kaasi waa bidco xun. Midda labaadna waa wixii khayr ah ee lafalo tasna cidi iskuma khilaafsana, waana wax lafalay nabiga kadib oo aan xumayn" waxaa soo weriyay xaafidkii Bayhaqi ahaa kitaabkiisa "Manaaqib as-Saaficiy" jus. 1, bogga 469.

Qofkii doonana ha eego wixii uu qoray xaafidkii ibn Xajar al-Casqalaani, Eebbe ha u naxariistee, ee ahaa "in xafladda mowlidka Nabiga sharafta leh ay tahay fal nabiga kadib la falay oo wanaagsan" mana ansaxayso fatwada dadka fatwooday in xafladda xuska mowlidku bidco xaaraan ah tahay, addilladii la soo sheegay awgeed, sidaas si la mid ah ayaana culumada lagu kalsoonyahay fatwadoodu tahay sida xaafidkii ibn Duxaya iyo Xaafidkii Ciraaqiga ahaa, iyo Xaafidkii as-Sakhaawi, iyo Xaafidkii as-Sayuudi, iyo Skeeke ibn Xajar al-Haythami, iyo sheikh Maxamad Bakhiit al-Mudiiciyi muftigii dalka Masar ee hore, iyo Sheekh Mustafa Najaa oo ah muftigii Bayruut ee hore, ninkii fatwo ku baxsha wax hadalkooda khilaafsanna warkiisu wax ka oo qaad malaha, maxaa yeelay hadalkiisu hadal mujtahid ma aha, waxaana lagu cibra qaataa wixii waafaqsan hadalka culumada lagu kalsoonyahay, amuuraha oo dhanna asalkoodu waa in ay mubaax yihiin, haddii aanan diintu xaaraantinimayn, diinta Ilaahayna waa fudayd ee culays maaha, Ilaah baana ah kan dadka waddada toosan tusa.

Waxaan Ilaahay waydiisanaynaa in uu inagu mideeyo fidinta khayrka, inagana waraabsho barakada Nabiga Muxamad ah Nabadgelyo iyo naxariisi korkiisa ha ahaatee. Aamiin.

Fiiro Gaar ah: (Ha ku tuurin xaashadan dhulka maxaa wacay waxaa ku qoran magacyo mudnaan leh)